

Morning Regional Dogri News Bulletin, 14 May. 2025

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- प्रधानमंत्री नरेन्द्र मोदी होरें चेतावनी दिंदे होई आखेआ ऐ जे ऐसी कोई थाह नेई बची दी ऐ जित्थे आतंकवादी, चैन कन्नै साह लेई सकन।
- केन्द्र सरकारै आखेआ ऐ जे जम्मू-कश्मीर कन्नै सरबंधत बकाया मुद्दा, पाकिस्तान आसेआ गैर-कन्नूनी ढंगै'नै कब्ज़ाए गेदे इलाके गी खाली करोआना ऐ।
- कैबिनेट मंत्री सतीश शर्मा होरें पाकिस्तानी गोलाबारी दी मारै हेठ आए दे बन्ने आहले ग्राएं दा दौरा लाइयै उत्थे जारी राहत सरबंधी हीलें दा जायजा लैता।
- जम्मू-कश्मीर दे बन्ने आहले इलाकें च नेई फटे दे मोर्टार दे ओकड़े शैल्ल ते गोलें दा पता लाइयै उ'नें'गी नकारा बनाना दा अभियान जारी ऐ, जेहड़े बन्ने पारा थमां पाकिस्तान आसेआ दागे मे हे।
- केन्द्र सरकारै, आयुर्वेद सरबंधी ध्याड़ा मनाने लेई 23 सितम्बर दी नमीं तरीक दा ऐलान कीता ऐ।

<><><><><><>

PM-Terrorism

प्रधानमंत्री नरेंद्र मोदी हों पाकिस्तान की इक सख्त सनेआ दिंदे होई आखेआ ऐ जे पाकिस्तान च हून आतंकवादिएं लेई ऐसी कोई थाहर नेई ऐ जित्थे ओह सुख दा साह लेई सकन कीजे भारत कश हून पूरी छमता ऐ जे ओह आतंकवादिएं की उंदे ठकानें अंदर बड़ियै मारी मकाई सकदा ऐ। कल पंजाब दे आदमपुर वायु सेना स्टेशन च ब्हाई योद्धाएं ते सैनिकें कन्नै गल्ल करदे होई उनें एह गल्ल आकखी।

आप्रेषन सिंदूर दी कामयाबी लेई थेआरबंद बलें दी सराहना करदे होई मोदी हों आखेआ जे भारत नै इस कार्रवाई दौरान आतंकवादिएं दे 9 कैप तबाह कीते न ते 100 कोला मते आतंकवादिएं की मारी मकाया ऐ। उनें थेआरबंद बलें दे पेशेवराना जज्बे, हिम्मत, दलेरी ते समर्पणभाव दी बड़ी मती सराहना कीती जिनें आप्रेषन सिंदूर दौरान राष्ट्र दी रक्षा कीती ते कार्रवाई की कामयाबी कन्नै तोड़ चाढ़ेआ।

<><><><><><>

JK Issue MEA

विदेश मंत्रालय नै आखेआ ऐ जे केंद्र शासित प्रदेश जम्मू-कश्मीर सरबन्धी मुद्दे की लेइयै भारत दा शुरू थमां गै इक राष्ट्रीय रों ते मत ऐ जे इन्दा नबेड़ा भारत ते पाकिस्तान नै आपूं च गै करना ऐ। नमीं दिल्ली च मीडिया आहलें दे इक सोआलै दा परता दिंदे होई विदेश मंत्रालय दे प्रवक्ता रणधीर जयसवाल हों आखेआ जे जम्मू-कश्मीर सरबन्धी मुद्दे की लेइये भारत दी नीति सदा थमां इक्कै ऐ ते एहदे च कोई बदलाव नेई कीता गेआ ऐ।

उनें अग्गे आखेआ जे पाकिस्तान कन्ने इक्कै बकाया मुद्दा ऐ ते ओह ऐ पाकिस्तान दे नजैज कब्जे आहले जम्मू-कश्मीर दे हिस्से गी खाली कराना।

सिंधु जल समझौते बारे पुच्छे गेदे इक सोआलै दे परते च विदेश मंत्रालय दे प्रवक्ता नै आखेआ जे एह समझौता पाकिस्तान कन्ने हमदर्दी ते दयाभाव रखदे होई कीता गेदा हा जिसी पाकिस्तान नै हल्के च लेंदे होई बन्ने पारा आतंकवाद गी समर्थन देना जारी रखेआ। उनें आखेआ जे हून पहलगाम आतंकी हमले दे बाद भारत नै सिंधु जल समझौते गी फिलहाल ताकड़े च रखी दिता ऐ जिच्चर पाकिस्तानी पूरी जिम्मेदारी कन्ने ते पूरी चाल्ली आतंकवाद दा समर्थन देना बंद नेई करी दिंदा।

<><><><><><>

Satish-Visit

कैबिनेट मंत्री सतीश शर्मा होरें जम्मू जिले च बन्ने आहले ग्राएं दा दौरा लाइयै हाल दी पाकिस्तानी गोलाबारी करी होए दे नुकसान दा आंकलन कीता। इस मौके पर मंत्री होरें कोट मैरा, छपरीयाल, प्हाड़ीवाला, पंजतूत, नारायणा, धलेरी ते होरें कन्ने लगदे इलाकें दे बसनीकें कन्ने मलाटी कीती। उ'नें प्रभावितें गी जकीन दोआया जे उ'नेंगी बेल्ले सिर राहत ते मदाद उपलब्ध करोआई जाहग। मंत्री होरें अधिकारिणें गी निर्देश दिता जे ओह मदाद आहले कम्में च तेजी आहनन। उ'नें आखेआ जे नुकसान दा व्यापक सर्वेक्षण कीता जाहग ते ओहदे मगरा मुआवजे सरबन्धी ऐलान बी कीते जाडन। इस सरबन्धें च मीडिया कन्ने गल्ल करदे होई मंत्री सतीश शर्मा होरें आखेआ

<><><><><><>

DC-Jammu Visit

तोआई हाल च बन्ने पारा थमां होई दी गोलाबारी दी पच्छोकड़ै च जम्मू दे डिप्टी कमिशनर सचिन कुमार वैश्य होरें तैहसील मढ़ ते परगवाल दा दौरा लाइयै उत्थे होए दे नुकसान दा आंकलन कीता ते जारी राहत सरबन्धी जतनें दी दिक्ख-सुन बी कीती। इस मौके उपपर प्रशासन दे वरिष्ठ अधिकारी उंदे कन्नै हे। डिप्टी कमिशनर होरें पाकिस्तानी गोलाबारी करी संपत्तिएं ते माल-बच्चे गी होए दे नुकसान दा जायजा लैता। एहदे अलावा उंनै सामुदायिक ते व्यक्तिगत बंकरें दा मूल्यांकन कीता ते एस.डी.एच. मढ़ च मेडिकल तैयारिएं दा निरीक्षण बी कीता।

<><><><><><>

Bomb Disposal Squads

बम्ब नकारा करने आहले फौज ते जम्मू-कश्मीर पुलस दे दस्तें, पिच्छले दिनें होई दी तनोतनी दरान पाकिस्तान आसेआ दागे गेदे, नेईं फटे दे मोर्टार शैल्ल ते गोलें गी नकारा बनाने लेई जम्मू-कश्मीर दे बन्ने आहले ग्राएं च बशेश अभियान रम्भेआ। एहदा मकसद नागरिक इलाकें च मोर्टार दे ओकड़े शैल्ल ते गोलें दा पता लाइयै उंनैगी नकारा बनाना ऐ, जेहड़े बन्ने पारा थमां पाकिस्तान आसेआ दागे गे हे। इंनै दस्तें आसेआ नियंत्रित ढंगगै'नै धमाके करियै इंनै पाकिस्तानी गोलें ते शैल्लें गी नकारा बनाया जा'रदा ऐ। अजें तोहड़ी रजौरी च 5 शा 6 शैल्लें गी नकारा बनाई दिता गेदा ऐ जदके होर दर्जन हारे शैल्लें गी अजें नकारा बनाया जाना ऐ। इस बारै मीडिया गी जानकारी दिंदे होई मुख सचिव अटल डुल्लु होरें दस्सेआ

<><><><><><>

Poonch Essential Services

पुंछ जिला प्रशासन नै इस गल्लै दी तसदीक कीती ऐ जे जिले च सेहत दिक्खभाल सुविधाएं ते बिजली ते पानी सने सब्भै जरूरी सेवां बड़ी बवस्थित ढंग्गै नै कम्म करै करदि'आं न। अस्पतालें च एम्बुलेंस सेवाएं सने सब्भै लोड़चदी दवाइयां खरी मती मात्रा च उपलब्ध न। बैंक ते ए.टी.एम. सेवां बी खरी चाल्ली कम्म करा करदि'आं न ते इंदे अलावा खाने-पीने दिएं चीजें, ईंधन ते एलपीजी दी बी लोड़चदी सप्लाई होआ करदी ऐ। बिजली ते पानी दि'आं सेवां ब्हाल करी दिती गेदिआं न ते गोलाबारी दी मारै हेठ आए दे इलाकें च नुक्सान दा आंकलन कीता जा'रदा ऐ।

<><><><><><>

CJI-Gavai

जस्टिस भूषण रामकृष्ण गवेई होर अज्ज भारत दे 52में प्रधान न्याऽधीश दे तौर उप्पर सगंध चुक्कडन। राष्ट्रपति द्रौपदी मुर्मु होर अज्ज राष्ट्रपति भवन च लोआए जाने आहले इक बशेश समारोह दरान जस्टिस गवेई होरेंगी सगंध चुकाडन। जस्टिस बी.आर. गवेई होर न्याऽमूर्ति संजीव खन्ना हुंदी थाह एह औहद्धा सांभडन।

<><><><><><>

Ayurved-Day

भारत सरकार नै आधिकारिक तौरा पर बरे 23 सितंबर गी आयुर्वेद दिवस मनाने दी तरीक घोषित कीती ऐ। आयुष मंत्री होरें इक बयान च आखेआ ऐ जे राज पत्र अधिसूचना दे राएं इसी अधिसूचित करी दिता गेआ ऐ।

पहले धनतेरस पर आयुर्वेद ध्याड़ा मनाया जंदा हा पर औने आहले दाहकें च एह 23 सितंबर गी मनाया जा करोग जेड़ा पैहले धन त्रोदशी आहले रोज मनाया जंदा हा। मंत्रालय नै आम नागरिकें, स्कूलें, सेहत पेशेवरें ते अंतरराष्ट्रीय भेयालें गी बी आखेआ ऐ जे ओह नोट करी लैन जे आयुर्वेद दिवस हून हर बरे 23 सितंबर गी गै मनाया जा करोग।

<><><><><><>

Amarnath-Yatra Samba

औंदी श्री अमरनाथ जी दी जातरा लेई तैयारिएं दा जायजा लैने गितै सांबा दे डिप्टी कमिशनर राजेश शर्मा हुंदे मार्गदर्शन हेठ डिप्टी कमिशनर दफ्तरै च इक व्यापक समीक्षा बैठक लाई गई। इस दरान श्रद्धालुएं दे रौहने-बौहने, पीने आहले पानी, बिजली दी सप्लाई, साफ-सफाई, सेहत सेवाएं ते ट्रैफिक प्रबंधन बकखी मुख तौर पर ध्यान केन्द्रित कीता गेआ। डिप्टी कमिशनर होरें अधिकारिएं गी निर्देश दिता जे ओह श्रद्धालुएं लेई बवस्थित ते सुरक्षित जातरा जकीनी बनान। श्रद्धालुएं दी सुविधा लेई मुख-मुख थाहें पर डिजिटल स्क्रीनां, बैनर ते साईनबोर्ड लाने दी जरूरतै पर बी जोर पाया गेआ।

<><><><><><>

Ramban-Drugs Free

दवाइएँ-औषधिएं दे नियंत्रण सरबन्धी विभाग रामबन आसेआ नशा मुक्त भारत अभियान दे तैहत तौले गै खेड्डें सरबन्धी गतिविधि रम्भी जाहग जेहदे राहें मुकामी नौजवानें गी खेड्डें कन्नै जोड़दे होई इक सेहतमंद जीवनशैली गी बढ़ावा बी दिता जाहग।

इस पैहलकदमी दा मकसद लोकेँ गी नशीले पदार्थे दे खतरें बारै जानकार बनाना ते एहदे करी पैदा होने आहले समाजी मुद्देँ पर लोs पांदे होई नशा-मुक्त भारत दा संदेस देना बी ऐ। इस सरबंथे च होर मती जानकारी दिंदे होई रामबन दे असिस्टेंट कन्ट्रोलर ड्रग्स होरें दस्सेआ

<><><><><><>